

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 252559 24 St
Zenica, 22.04.2025. godine

Općinski sud u Zenici, stečajni sudija Adnan Herceg, u prethodnom postupku za utvrđivanje uvjeta za otvaranje stečajnog postupka nad stečajnim dužnikom „MANDIĆ-COMPANY“ d.o.o. Tešanj, Rosulje br. 75, Jelah, Tešanj, za provođenje stečajnog postupka nad imovinom navedenog privrednog društva kao protupredlagatelja, koji je pokrenut po prijedlogu predlagatelja „MANDIĆ-COMPANY“ d.o.o. Tešanj, Rosulje br. 75, Jelah, Tešanj, kojeg zastupa punomoćnik Advokatsko društvo „Alemdar Brkić“ d.o.o. Tešanj, ul. 1. Marta br. 1, Tešanj, dana 22.04.2025. godine, donio je sljedeće:

RJEŠENJE

Pozivaju se povjerioci i zainteresovana lica da u roku od 30 dana od dana objavljivanja poziva predlože otvaranje stečajnog postupka i uplate predujam za obezbjeđenje troškova stečajnog postupka u iznosu od 5.000,00 KM, na depozitni račun suda broj: 134-010-0000044837 otvoren kod ASA Banke d.d. Sarajevo, Poslovnica Zenica.

Ukoliko povjerioci i zainteresovana lica u navedenom roku ne predlože otvaranje stečajnog postupka i ne izvrši uplatu predujma troškova stečaja, stečajni sudija će otvoriti stečajni postupak i odmah zaključiti postupak nad društvom „MANDIĆ-COMPANY“ d.o.o. Tešanj, Rosulje br. 75, Jelah, Tešanj, te narediti brisanje ovog društva iz sudskog registra.

O b r a z l o ž e n j e

Predlagač „MANDIĆ-COMPANY“ d.o.o. Tešanj, Rosulje br. 75, Jelah, Tešanj kao stečajni dužnik je ovom sudu podnio prijedlog za otvaranje stečajnog postupka, dana 25.10.2024. godine.

Privremeni stečajni upravnik je na ročištu održanom 21.04.2025. godine izjavio da ostaje kod izvještaja, navodeći da je obavio sve radnje i zadatke navedene u rješenju o pokretanju prethodnog stečajnog postupka. Uspostavljen je kontakt sa punomoćnikom u ovom predmetu, osnivačem društva kao i agencijom koja za stečajnog dužnika obavljala i obavlja računovodstvene poslove, te je u skladu sa rješenjem obišao prostor koji se u sudskom registru vodi kao sjedište firme gdje nije primjetio bilo kakve poslovne ili druge aktivnosti vezano za ovo društvo. Sa predstavnikom agencije obavio je konsultacije u smislu pojašnjenja i preciziranja problema finansijske prirode koji su u konačnici i doveli do pokretanja stečajnog postupka. U izvještaju je također naveo i ostale identifikacione oznake kao i vrsta i priroda i način obavljanja registrovane djelatnosti. Društvo je registrovano sa tada minimalnim osnivačkim ulogom od 2.000,00 KM sa preovlađujućom djelatnosti „fasadni štukatorski radovi“. Odmah ili neposredno po registraciji osnivač se povezao sa određenim stranim firmama tako da je počeo većinu poslovne aktivnosti obavljati u inostranstvu na poslovima iz šire oblasti zaštite postrojenja opreme i cjevovoda. Obezbijeđenje i plaćanje zaposlenika vršeno je putem detašmana koje je izdavala vanjsko trgovinska komora BiH na osnovu međudržavnih sporazuma. Društvo je postalo prepoznatljivo na tom zapadnom i specifičnom tržištu a iz tog su odnosa počeli i sklapati i samostalne poslove u Švedskoj, Poljskoj, Belgiji itd. . Kancelarijsko poslovanje koje je ujedno i sjedište firme društvo je obavljalo u zakupljenom prostoru prvu u Rosuljama br. 45 a zatim na br. 75. Problemi u poslovanju odnosno problemi finansijske prirode su se javili u drugoj polovini 2022. godine

kada je nadležna inspekcija Kantonalnog poreznog ureda Zenica u postupku inspekcijskog nadzora donijela rješenje o dodatno utvrđenim obavezama po osnovu obračuna i uplate direktnih poreza, tj. plata i naknada zaposlenih, poreza na dobit, te kao posljedica toga i kamata. Predmetno rješenje iznosilo je dodatni teret u iznosu od 272.794,93 KM. Predmetni obračun je urađen na naknade i plate zaposlenika koji su preko detašmana obezbjeđivali radne dozvole i vršili stvarni rad u inostranstvu. Porezni obveznik sada stečajni dužnik se žalio na rješenje ali je Federalno ministarstvo financija odbilo žalbu i potvrdilo prvostupanjsko rješenje. U međuvremenu dok je trajao navedeni upravni spor a na osnovu tada validne dokumentacije predat je prijedlog na pokretanje likvidacionog postupka, a koje je povučen kad je navedeno rješenje postalo pravosnažno. Nakon konačnog rješenja društvo je putem punomoćnika podiglo i tužbu Kantonalnom sudu u Zenici radi poništenja rješenja Federalnog ministarstva financija nakon sagledavanja svih činjenica i ovaj tužbeni zahtjev je povučen. Prema utvrđenom činjeničnom stanju stečajni dužnik je zadnje poslovne aktivnosti obavio u prvoj polovini 2023. godine. Transakcijski račun je blokiran dana 05.12.2024. godine u iznosu od 287.647,04 KM. Također navodi da je uz prijedlog za pokretanje stečajnog postupka pored druge dokumentacije priloženi i bilansi stanja i uspjeha sačinjeni na dan 30.06.2024. godine. U fazi realizacije i sačinjavanja izvještaja o radu sukladno i rješenju o pokretanju prethodnog postupka sačinjen je i obvezni godišnji obračun za 2024. godinu koji je i predat i ovjeren nadležnoj instituciji. U većem dijelu u svom izvještaju koristio je ove finansijske podatke iz navedenog godišnjeg izvještaja. Prema bilansu uspjeha za 2024. godinu društvo je ostvarilo ukupne prihode u visini od 9.500,00 KM, a od toga skoro kompletan iznos se odnosio na ostale prihode i dobitke. S druge strane za isti period ostvareni su ukupni rashodi od 366.368,00 KM od toga poslovni rashodi su iznosi 3.941,00 KM dok ostatak se odnosi na ostale rashode i gubitke. Navedena stavka se skor u potpunosti odnosi i posljedica je obveznog godišnjeg preispitivanja i ucjenjivanja kvaliteta kako aktive odnosno imovine tako i pasive odnosno obaveza. Slijedom navedenih podataka za 2024. godinu ostvaren je gubitak od 356.868,00 KM. Prema bilansu stanja na dan 31.12.2024. godine društvo je iskazalo ukupnu imovinu i to u vidu kratkoročne imovine u iznosu od 5.302,00 KM a ista se sastoji od novca i novčanog ekvivalenta u iznosu od 664,00 KM i akontacije poreza na dobit u iznosu od 4.638,00 KM. U međuvremenu kako je navedeno u potvrdi o statusu i stanju računa od Privredne banke d.d. Sarajevo od 04.03.2025. godine navedeno je da je račun blokiran i da na njemu nema sredstava. Sukladno prethodno navedenom zatečena sredstva na računu su skinuta i proslijeđena na račun Budžeta ZDK. S druge strane u pasivi je iskazana stavka, ukupni kapital u iznosu od 5.293,00 KM a sastoji se od: akumulirana, neraspoređena dobit iz prethodnih godina i perioda u iznosu od 360.161,00 KM; gubitak tekućeg perioda u iznosu od 356.868,00 KM; i vlasnički kapital u iznosu od 2.000,00 KM. Bitno je također naglasiti da je zbog nesporazuma ili površne komunikacije između osoba unutar društva kao i lica iz poslovnog okruženja napravljen propust u pravilnom i blagovremenom evidentiranju pravosnažnog rješenja Poreske uprave odnosno Federalnog ministarstva financija o utvrđivanju dodatne obaveze u iznosu od 287.647,04 KM. Na ovaj način prezentirani godišnji izvještaj za 2024. godinu nije realan i ne odražava fer i korektnom stanje društva. Dalje navodi, da je račun otvoren ko Privredne banke d.d. Sarajevo je i dalje blokiran s tim da je početni iznos blokade umanjen za 2.028,00 KM. Društvo duže od jedne godine ne obavlja poslovnu ili drugu djelatnost ne ostvaruje prihode sukladno obezbijeđenim i uz izvještaj dostavljenim potvrdama i uvjerenjima iz javnih registara društvo nema opreme postrojenja alata i motornih vozila te nije u mogućnosti da izmiri navedene dospjele obaveze te su u potpunosti ispunjeni uvjeti za otvaranje stečajnog postupka jer je u smislu člana 6 Zakona o stečaju utvrđena platežan nesposobnost. Iz navedenog je vidljivo da društvo nije imalo nikakve mogućnosti da obavlja poslovnu aktivnost u toku prethodnog postupka. U skladu sa članom 61 stav 2 tačka b Zakona o stečaju utvrđeno je da je organ ovlašten za zastupanje stečajnog dužnika podnio prijedlog za otvaranje stečajnog postupka 25.10.2024. godine odnosno 41 dan prije donošenja rješenja Kantonalnog poreznog ureda Zenica te rješenja o naplati porezne obaveze iz imovine poreznog obveznika te naloga Privrednoj banci d.d. Sarajevo za blokiranje sredstava na računu od 05.12.2024. godine.

Prema tome organ ovlašten nije počinio prekršaj jer je u periodu od 60 dana od prethodno iznesenih činjenica podnio dokumentovani prijedlog za pokretanje prethodnog stečajnog postupka. Imajući u vidu navedeno, zakonske obaveze te obim iskazanih obaveza predlažem da sud objavi poziv zainteresovanim licima tj. povjeriocima, ako imaju opravdani interes, da predjme iznos od 5.000,00 KM na ime troškova nastavka stečajnog postupka te da ukoliko niko u ostavljenom roku ne predjmi navedeni iznos istovremeno donese rješenje o otvaranju te i zaključenju stečajnog postupka nad ovim društvom kao i brisanje iz sudskog i drugih registara po pravomoćnosti istog..

Iz izvještaja privremenog stečajnog upravnika proizilazi da društvo već izvjesno vrijeme ne obavlja poslovnu ili drugu djelatnost, ne ostvaruje nikakve prihode, ne posjeduje vozila, opremu i alat za obavljanje poslovnih aktivnosti, da nema mogućnosti da izmiri dospjele obaveze, i da su ispunjeni uvjeti za otvaranje stečajnog postupka jer je utvrđena platežna nesposobnost, a stečajni dužnik nema imovine, pokretne ili nepokretne čijom prodajom bi se formirala stečajna masa za podmirenje troškova stečajnog postupka. Na osnovu navedenog privremeni stečajni upravitelj je mišljenja da su se stekli razlozi za otvaranje stečajnog postupka ukoliko povjerioci predjme troškove stečajnog postupka.

Kako stečajni dužnik ima obaveze, a nema imovine, pa ni za pokriće troškova stečajnog postupka, to je sud primjenom odredbe člana 102. stav 7. i 8. Zakona o stečaju („Službene novine F BiH“, broj: 53/21), pozvao povjerioci i zainteresovana lica da predlože otvaranje stečajnog postupka i predjme dovoljan novčani iznos za pokrivanje troškova stečajnog postupka (otvaranje i provođenje stečajnog postupka), ako su zainteresovani za vođenje stečajnog postupka, kod situacije kada nema imovine stečajnog dužnika iz koje bi se mogle namiriti obveze, pa ni sami troškovi otvaranja i vođenja stečajnog postupka. Visina troškova srazmjerno je određena visini troškova koji se očekuju, a koji su neophodno potrebni za otvaranje i vođenje stečajnog postupka.

S obzirom na izloženo odlučeno je kao u izreci ovog rješenja primjenom odredbe članu 102. stav 7. i 8. Zakona o stečaju, a ovim rješenjem povjerioci i zainteresovana lica su upozoreni na posljedice propuštanja postupanja po pozivu ovog suda.

PRAVNA POUKA:
Protiv ovog rješenja nije
dozvoljena žalba.

Stečajni sudija
Adnan Herceg, s.r.